

C V D

A I G C

1 6 9 9

D. 4. 44

~~223~~

20 a

g. 2 g. 4/10
~~2~~ 199. X





1
Eigentliche Warhafft
tike vnd ganz gründliche Beschrei-
bung der Stadt Danzig / sampt dem zuge-
hörenden Blogkhaus / die Weiffelmunde ge-
nant / Belegung gantz ordentlichen zusamen
gesetzt / was sich alle tage zugetragen / vnd in
Scharmützein begeben hat / Durch einen
alten Kriegsmann gestellet / vnd mit fleis
zusamen gezogen / geschrieben den
25. Nouemb. Im Sieben
vnd Siebenzigsten
Jare.



M. D. LXXIX.

254


Eigentliche Beschreibung/ was sich
in der Belagung Dantzig zugetragen hat.

Den 13. Junij im 1577. jar/
hat König. May. in Polen / Steph.
der erste / zwischen Acht vnd Neun
vhren vor Mittag / die Stadt Dan-
tzig berennet / Vnd war endlichen in willens/
in der Jungen Stadt vnd daselbens herum /
sein Lager zuschlagen / Als aber das inhabende
Kriegsvolck den gantzen tag mit ihme Schar-
mützelt / auch von dem Wahl mit dem groben
Geschütz / ihme hart zugesetzt ward / must er die-
selbe gelegenheit verlassen / vnd Lagert sich ge-
gen den Abend auff den Bischoffsberg / etc.

Den 14. Junij Morgens frühe / hat man
vernomen / das er sein Lager daselbst geschla-
gen / auch die Nacht vber hefftig gegen der Stat
Geschossen / Geschantzet / vnd darneben den gan-
tzen Tag ward mit strenger Arbeit die Schan-
tzen verweittert vnd fort getrieben.

Den 15. Junij / schofs der Feind mit 4. bis
weilen 5. Kleinen Stücklein / nach den Weusern
vnd Thürmen / Das trieb er so lange / bis er
mit dem grossen Geschütz in seine Schantz kom-
men mocht.

Den 16. vnd 17. Junij / schofs er gar heff-
tig nach des hohen Thores Thurm / Also / das
man Wollsecke daran hengen must / vnd die
Kugeln / so darneben ab vnd in die Stadt gieng
gen



AB 154-182

gen/ War Gott lob nicht mehr als Weib vnd
Man im Bet/ vnd eine Magd auff des Heiligen
Geists Brück erschossen. Ob wol etliche Kugeln
gefunden worden / so 56. 60. vnd 75. Pfundt
Eisen gewogen.

Den 17. Junij auff den Abendt / war auff
ein tag ein Anstand gemacht/ den 18. War es im
Stillstandt.

Den 19. war es bisz auff den Abendt im
Stillstandt / diesen Abendt war widerumb 2.
Tage Stillstandt gemacht.

In diesen 6. Stillstandes tagen/ ist so weit
gehandelt worden / das den 18. Junij drey von
des Feindts Herr / Als nemlich / der Oberst
vber das Vngerische Kriegsvolck / vñ ein Graff
so ein Frantzoss/ vnd ein ander Herr / welcher
ein Schlesier sein sol/ vmb frieden zuhandeln/
des Feindes fürnehmen zuerkleren / vnd der Ge-
mein neben dem Rath fürzuhalten.

Dagegen mussten drey / von den Dantzker
Herrn zu Geißel in des Feindes Leger ziehen.
Als nun die Gesandten den 19 gehandelt / vnd
sich aller sachen berathschlaget/ Ward den 20.
Junij / die gantze Gemein durch ein Trometer
auff den Marckt für das Rathhaus erfordert /
anzuhören / was des Feindes Will / Beger vnd
meinung were. Welches also öffentlich vngesehr-
lich bisz vmb 10. vhr vorlesen wordē/ In summa
die Artikel alzulang / jedoch war das der für-
nehmste inhalt / Das er einen Ersamen Rath
vnd die Gemeine gerne wider einander verhe-
tzen wolte. Damit vneinigkeith entstehen möcht

te/vnd schilt einen Ersamen Rath/Entfrembs
der des gemeinen Gutes / auch Meineidische
Rebelliosi/vnd das Kriegsvolck / oder Besat-
zung/ so in der Stadt liget / schilt er Vnnütz
Verlauffen/ Losß Volck / mit viel mehr spöttli-
schen Scheldworten / vnd kompt letztlich da-
hin mit glatten Worten. Dieweiler wol weis/
das Dantzig kein Geldt / auch aller Menschli-
chen hülf / darzu von Gott / als Rebelliosi vnd
Trewlose / daran Gott ein gros misgefallen ha-
be/ verlassen. Vnd damit den gemeinen Nutz
vnd allem Vnrath / so daraus entsprungen/ für-
komen/vnd gebessert werden möchte / sey er ver-
ursacht worden / solches alles zu bessern / vnd
gelimpfflichen durch billiche / auch leidentliche
Artickel/ so derwegen fürgenomen/abzustellen.

Begeren derwegen vnerzüglich/ das sie die
Besatzung oder inhabendes Kriegsvolck / ab-
schaffen/ das Beschütz von den Wälen abfüren/
vnd die Stadt ihme ohne weidern auffzug erge-
ben sollen. Damit er seinem gefallen nach / ein
freyen ein vnd ausgang haben müge. Vnd vnter
andern war Propria laus, eigen Lob / was er für
ein gnedig Gemüt gegen der Stadt trage / auch
mit was sonderlichen gaben vnd gnaden er von
Gott begnadet/ sey nicht vergessen.

In summa/ der Speck auff der Falln war
gesotten vnd gebraten. Aber die Wense schme-
cketen den Entian so darunter verborgen / wol-
len derwegen nicht dauon essen. Der Feind
vermeldet auch/ wo die Stadt das gnedig erbie-
ten nicht würde annemen/ Sondern mit Wals-
starrigkeit

starrigkeit fortfaren / würde er verursacht / Weg
vnd Mittel für die handt zunemen / das Weib
vnd Kindt solches entgelten müsten.

Da nu der Oberst Hans von Cöllen / auch
der Ritmeister Claus von Ungern die verach-
tung des Deutschen Kriegsvolcks vernomen /
haben sie es genugsam verantwortet / eines Er-
samten Raths bezüchtigung / Ist von ihnen ver-
antwort / vnd solche verantwortung / öffentlich
vor der gantzen Gemein verlesen worden / wie
folget.

Erstlichen / Ein Ersam Rath beschweret
sich der vnbilligen aufslagen / der entfrembdung
auch bezüchtigung / als Rebelliosi / Welches sie
in keinem weg mit Tadt niemals erzeiget / viel
weniger gedacht zuerzeigen / sondern er der Feind
habe sie der gegenwehr / zu beschützung Weib
vnd Kinder / auch erhaltung ihrer alten herge-
brachten Privilegien / verursacht / vnd in grossen
schaden gebracht / Darzu sein alle Bücher der
Rechen schafft vorhanden / im fall deren jemand
zusehen / sein sie erbötig jederzeit genugsam be-
weis darzulegen.

Der Allmechtige Gott / werde nicht allein
ihr Beschützer wider ihre Feinde / sondern auch
ein helffer vnd Testimoniator sein / alles das ge-
schehen / Sey vnnormeidlicher notturfft halben
die vnbilligkeit abzuwenden / darzu gezwungen
vnd gedrungen worden / vnd noch diese stunde
zuthun gedencken / zuerhaltung ihrer alten Pri-
vilegien vnd Freyheiten.

Da sie aber bey alter Privilegien bleiben

A iij

müß

mügen / wollen sie sich als die gehorsamen / wie von alters herkommen / gantz gehorsamlich finden lassen vnd erzeigen / wo nicht. So sein sie bereidt vnd willig / alles das zu leiden / das ihnen der Allmechtig Gott derwegen aufflegen wird / denn es ja billich ein jeder für sein Vaterlandt zu streitten / damit Privilegien / Weib vnd Kind erhalten werden mügen.

Alles das / hat die gantze Gemeine neben dem Rath / sich hefftig gegen einander verbunden / vnd neben den Kriegsleuten zu einander geschworen / Leib vnd Leben mit einander aufzusetzen / Mit dieser antwort musten die Herrn Gesandten / oben vermeldet den 21. Junij widerumb aus der Stadt / vnd die Geißel kamen widerzubaus.

Den 22. Junij waren alle neue angekommene Knechte gemustert / vnd vnter die Fenlein gesteckt / in dieser zeit ist nichts feindliches gegen den Feind gehandelt worden. Allein welche von den Feinden / dem Wahl zu nahend gangen / zu denselbigen ist mit Rohren geschossen worden. Aber die im Leger vor dem Blockhaus / so Ernst Weyer drüber Oberster gewesen / auch die auff dem Blockhaus haben alle tage mit einander Gescharmützelt / denn daselbst kein stillstandt gewesen ist

Recht als man die Knechte Mustert / haben sich etliche Deiducken / vngesehrlich 30 oder 40. aus der Schantz gethan / herab bey Sa otlandt in die Kohlgarten gelauffen / Welches Claus Dnger Oberster Leutenants / so vngesehr auff dem

Dem Wahl gewesen/ersehen vnd 16. gute Schüt-
tzen hastlichen zu sich genommen / hinans gefal-
len / vnd 14. der Feinde erlegt / vnd ist darnach
wol 2. stunden aus dem Leger auch von den Wä-
len hefftig mit dem grossen Geschütz gegen ein-
ander geschossen worden / vnd sein nicht mehr
als drey von vnserm Volck / doch dem Leben
vnshedlich geschossen worden.

Inserer Herren Viere / sein in dieser zeit in
des Feindes Leger gewesen / vnd haben widers-
umb / biss auff den 25. Stillstandt gemacht.

Den 23. War es im Stillstand / doch mocht
te niemand den Wehren oder Wahl zu nahend
gehen.

Den 24. vor Mittage / fürt der Feind seinen
gantzen hauffen in das weite feldt / in sieben
Schlachtordnung gestelt / das man von dem
Wahl wol sehen mocht / doch war Stillstandt
gehalten.

Den 25. Junij nach Mittage / die Glocke
6. hette der Stillstand ein ende / Da lies der
Feind alle sein Geschütz vier mal nacheinander
in die Stadt abgehen / that am Volcke keinen
schaden / aber etliche Decker vnd Siebel fielen
darnider.

Den 26. Junij / die Glocken 12. Sind die
Herrn abermal in des Feindes Lager gereiset /
zu abent vmb fünffe sind sie widerumb zuhaus
komen.

Den 27. Junij / vmb 3. vhr nach Mittage
lies der Feind alle sein Geschütz / einmal in die
Stadt abgehen / vnd ward ein Steinflugel ge-
funden / so 154 pfundt gewogen. Den

Den 28. vmb 2. vhr nach Mittage/sein die
Herrn Abermals in des Feindes Leger gereiset/
vnd zu abent vmb 5. kamen sie wider zu haus.

Den 29 Junij/ vngesehrlich vmb 11. Ward
vmbgeschlagen / wenn man zum andern mal
vmbgeschlagen würde/ sol ein jeder Schütz zu sei-
nem Fenlein zihen/ Also war auch in eingesteck-
tem Mundstücken/ den Doffleuten vmbgebla-
sen. Vmb 1. vhr kamen die Deutschen Schü-
tzen/ die Schotten sampt den Doffleuten/auff
den Holtzmarckt in die alte Stadt / in willens
einen ausfall zuthun / aber es gieng zu rücke /
Welches die Kriegslente hart verdros. Doch
vnterstunden sich etliche Schützen/ Deutsch vnd
Schotten / kriegen ein Both / liessen sich vber
die Muclaw stillschweigend vberführen / die ka-
men bald an den Feind / vnd war eben zu beiden
seiten anfang zusehen: Als dem der gerne dan-
tzen wil/ dem ist bald gepfliffen/ In summa es
kamen 10. wider 10. 20. wider 20 30. wider 30.
Zuletzt kam der Feind mit gantzen Fenlein/
Aber er ward mit gewalt wider in die Schantz
getrieben. In solcher zeit als der Feind den Ab-
bruch vermercket / hat er mit dem grossen Ge-
schütz hefftig in die Stadt geschossen/ aber nie-
mands denn den Deusern schaden gethan. So
wards fürwar auff dem Wall vñ Kundelen auch
nicht gespart / vnd weret der Scharmützel bis
vmb 7. Der Bathor musste mit schanden wi-
derumb in sein Lager ziehen / vnd in die 150.
Man hinder ihm lassen. Wir haben vber 16. Per-
sonen nicht verloren / vnd kriegten die Knecht
gute Beut von Röcken vnd Sebeln. Den

Den 30 Junij/ Ist der Feind in die Neringe
gefallen/ vnd den Bawren daselbst etlich Dibe
hinweg genommen / alhie vor der Stadt hat er
geschantzet vnd Lauffgraben gemacher.

Den 1. Julij/War es allenthalben fein still/
beide in der Stadt vnd in den Legern.

Den 2. Julij/ In der Nacht / vngefehrlich
vmb 8. oder 9. vhr / Da waren die Deutschen
vnd Schottischen Schützen / vnd wer sonst lust
hatte ausgelassen / vnd in drey hauffen getheil-
let / den einen hauffen mit hülff des Blockhaus
inhabenden Kriegsvolcks / Ernst Meyers vor
dem Blockhaus liegend Leger anzufallen / die
andern zwen hauffen / in des Feindes Lager
blinde Lermen zu machen / damit der anschlag
vor dem Blockhaus fortgehen möchte. Als es
nun vmb 2. vhr in der Nacht / in das Werck ge-
bracht / war Ernst Weyhers Leger erlegt / ver-
taget vnd 13. Hauptstück Geschütz erobert / vnd
Kriegten die Knechte gar gute Beute / Gott sey
lob / Aber die so des Feindes Schantz angefal-
len / dieweil es allein ein blinder Lermen / sein
widerumb in die Stadt erfordert worden / vnd
hat der Feindt 500 Personen / Wir nicht vber
130 verloren / Ist ein Schottischer Capitani so
flüchtig ins Wasser gesprungen vnd ersoffen.

Den 3. Julij / War es still / den 4. war es
still / den 5. war es still / Allein zwischen 5. vnd 6.
ward Gescharmützelt.

Den 6. war es still.

B

Den

Den 7. Julij/ War zwischen 5. vnd 6. Bescharmützelt.

Den 8. Ward widerumb Bescharmützelt.

Den 9. hat der Feind hefftig mit 9. Steinbüchsen / Gros vnd Klein Steinkugeln in die Stadt geworffen. Aber vber 4. oder 5. Personen nicht geschediget / Allein die Deuffer zimlicher massen gestraffet.

Den 10. 11. vnd 12 Julij war es still.

Den 13. Julij vngesehrlich zwischen 2. vnd 3. in der Nacht/ steckt der Feind das Haus bey der Windmühl an der Motlaw in den Brandt/ es lag ein Wasser Kunst/ in dem Graben/ vnter dem grossen Bolwerck / die war auch mit Feuer angestecket/ vmb 3. vhr / waren die Deutschen Leuffer auch Schotten Schützen ausgefüret / dem Feind in die Schantz zu fallen / in welchem ausfall die Deutschen Schützen sich Ritterlich gehalten / Wie aber die Schotten / lass ich sie verantworten / die Deutschen kamen an die Schantz / doch waren sie widerumb zu rücke getrieben / die Schotten stunden vnd sahen zu / Domals hat man erstmal vernomen / das der Feind kein grob Geschütz in der Schantz mehr hat/da sieng sich ein ernstlicher Scharmützel an/ dergestalt / das der Feindt mit seinem gantzen hauffen / in freyen Schlachtordnungen in das Feld rucket / sein Lager vbergeben must / die Deutschen Schützen namen die Schantzen vnd Lager ein / steckens in den Brandt / vnd war also

also / vngesefhrlich bisz vmb 10. mit Reuter vnd
Knechten gegen einander Gescharmützelt / auch
die Thor auffgethan / da ist letztlich der Feind
algemach abgezogen / Vnd ein Meil von der
Stadt / genandt Prust / sein Lager geschla-
gen.

Den 14. 15. 16. vnd 17. Julij / war es still /
Vnd den 18. kamen vom Feindt 200. Pferd
in einem streiff nach dem alten Lager / erlegten
vngesefhr 30 Weib vñ Mans personen gefangen

Den 19. 20. 21. 22. 23. 24. 25. 26. 27. vnd 28.
Julij ist nichts fürnemlichs gehandelt worden /
allein das man allenthalben die Wäle vnd Kun-
dele / beide in der Stadt vnd auff dem Block-
haus gebessert hat.

Den 29. Julij / Ward der schöne Krug
Neugradt abgebrandt.

Den 30. 31. Julij / den 1. 2. vnd 3. Augusti /
Ward an den Wälen gebessert.

Den 4. vnd 5. nam der Feindt das Dihe
vor der Stadt hinweg / diese Nacht brandte der
Feind 2. Dörffer ab.

Den 6. war es still.

Den 7. Augusti / Morgens frühe / zogen
vnser Hoffeute mit der gantzen Fanen für das
hohe Thor / in willens die Newe angekomme-
nen Reutter zu der Fahnen schweren zu lassen.
Als aber vngesefhrlich der Feind mit seinem gan-
zen Hauffen die Nacht daher zog / in willens
widerumb für das Blockhaus zuschantzen / vnd

B ij

eben

eben des Feindes Macht / so sich zwischen den Bergen erhalten / unsere Doffelente ansichtig worden / Haben sie mit gantzer macht in unsere Doffelente gesetzt / vnd zwö Stunden Beschar mützelt / vnd sein 4. oder 5. vnser Doffelente mit Kenstangen Todt gerennet worden / der Feind hat auch nicht wenig Schaden genomen.

Den 8. Augusti / hat der Feindt angefangen das Blockhaus zum Sturm zuschiessen / vnd den 9. ward ein kleiner Scharmützel / denn der Feind hette zwey Leger / das ein / ein viertel Meil von der Stadt / bey der Olive / das ander vor dem Blockhaus.

Den 10. Augusti / waren die Schotten ausgelassen / die Scharmützelten hefftig mit dem Feindt / Also das von beiden theilen viel Volcks geblieben.

Den 11. Augusti / kam Kundtschafft in die Stadt / wie in dem Werder etliche Polen legen / daselbst die Bawren zu plündern / da sein die Doffelente vnd Schützen ausgefallen / die Feindt erlegt / vnd haben die vnsern gar gute Beut von Pferden vnd andern Gut erobert.

Den 12. Augusti vmb 12. vhr / Sein vngefehrlich 300. Schützen angefüret worden / die habē den Feind so lange gereitzet / das er sich mit dem gantzen hauffen / so in diesem Lager gelegen / in ein Scharmützel begeben / unsere Schützen biss in das Thor gelaget / vnd also widerumb abgezogen / von den vnsern / so vmbkommen /

men / sein 50. Man in ein Grab begraben worden. Was aber von dem Feind / kan man nicht gewis sagen / doch kundte man in dem Feldt wol mercken / das er auch kein Seiden gespannen.

Den 13. 14. 15. 16. 17. 18. 19. Augusti war es vor der Stadt still / vnd den 21. Augusti / hat der Feindt nicht anders gethan / denn Tag vnd Nacht / ohne auff hören / mit gantzer gewalt auff das Blockhaus geschossen / Vnd hat also 14. gantzer tage geweret / Ist also die gantze summa 9875. schüsse.

Als man nun vermercket / das das Blockhaus Wehrlos / vnd zum Sturm geschossen war / denner alles Holtzwerck / so dem Haus zum besten gewest / Feuerkugeln vnd Glühende Schrotten in den Brandt geschossen vnd abgebrandt hette / das man endlichen nicht anders / als des Sturms zuermuten war.

Das man den 22. Augusti von jedem Fenlein 10. Rott Schützen vnd zwo Rotte Doppelsoltener / auch zwey Fenlein Schotten / so zuuorn in einer Schantz bey dem Blockhaus lagen / zu hülff dem Feinlein Knecht / so allezeit auff dem Hause liegen / ausgefüret worden / auff den Sturm zuwarten / etc.

Den 23. Augusti vmb Mittag zeit / da begunde der Feind in grossen Schiffboten Volck vberzusetzen / auch Tackel an das Bolwerck fast zumachen / damit er desto bestiger mit dem Volck

cke hin vnd wider kommen/ denn er wol wuste/
das wir mit dem grossen Geschütz nichts aus-
richten mochten. Denn er hatte langest an dem
Wasser eine gewaltige Schantz auffgeworffen/
die voller Schützen lagen/ vnd darzu ein Block
haus in seinem Lager gebawet / damit er die hö-
he mit dem grossen Geschütz haben möchte /
Welches er alles dermassen ins Werck gebracht/
das vnser keiner sich ruhren dorfft/ er ward ge-
schossen.

Als nun der Sturm hefftig in dem Werck
war/ auch bis in die finster Nacht weret/ möch-
te er doch das Haus nicht erobern. Jedoch
wehr letztlich nicht endsetzung aus der Stadt
kommen / were es vielleicht vbel abgangen /
Denn der Feindt hette Vns/ vnd wir Ihn/ wie
derumb 6. oder 7. mal in der Flucht / vnd jag-
ten einander durch die Gesaltzen See / jetzt hin
jetzt her / vnd blieb für war viel gut Volcks
Todt auff vnser seiten / vnd wol drey hundert
Knechte geschediget.

Was aber auff des Feindes seiten geblie-
ben / Kan man nicht gewis wissen / denn der
Weissel Strom hat es alles mit sich weg genom-
men/ Vnd dieweil die Nacht den Sturm geena-
det / wolte doch der Feindt alzumal nicht vber
die Weissel nach ihrem Lager / verhofften bes-
ser glück/ worffen die Stein aus dem Bolwerck
heraus/ machten mit den Steinen eine Schantz
für sich/ vnd legten sich in die Bolwerck / wie
die Füchse in die Löcher.

Den

Den 24. Augusti/ frühe Morgens hetten
sie auff das Bolwerck oder Steinschantze 8.
fliegende Fenlein gesteckt / Vnd war also der
Sturm mit gewalt / widerumb angefangen /
denn der Feindt hette die Nacht vber sein Volck
verfrischet vnd gestercket. Aber es wolt dem
Feindt alles nicht helffen/ denn ihm ward star-
cker widerstandt gethan. Aber zwischen 7.
vnd 8. wardt der Trewbare Heldt / Als der
Stadt Oberst/ Hans Winckelburch von Cöl-
len/ nach dem er sich trefflichen wol gehalten /
zwerch vber die Nasen / als er sich nun wenden
wollen / hinden durch den Kopff / das ihm die
Kugelfornen an der Stirnen / zwischen beiden
Augen stecken blieben ist / todt geschossen.

Es war auch der Oberst auff dem Block-
haus / Georg von der Schweinitz genandt /
zwerch vber den Kopff geschossen/ aber es schad
ihm am Leben nicht. Gleichwol ward dem
Feindt widerstandt gethan/ das er mit schanden
das Haus verlassen / in seine Menslöcher Krie-
chen / vnd verbergen mußte.

Diesen tag / bleib auch zu beiden seiten viel
gut Volck. Des Feindes schaden kan man
nicht gewis erfahren / denn der Weiffelstrom hat
es alles zu Seewerts eingetrieben. Diweil der
Wind recht auff das Land gestanden / sein des
Feindes Todte Personen bey 100. 60. 50. 30.
vnd 20. auff vnd abe / minder vnd mehr / an
das Land gefüret / auch im Königsberger Tuff
welches

welches 24. Weil vom Blockhaus liget / gefunden worden / daraus wol zuersehen / das die 2. tag kein Jungfrauen Tantz gewesen sey.

Den 25. Augusti / Als der Feindt vernam / das er mit Stürmen nichts ausrichten mochte / begundt er ein Brücken vber die Weiffel zu schlagen / in meinung sein Volck / so in den Meuslöchern auff dem Bolwerck lagen / zuendsetzen / vnd also forthin nach gelegenheit widerumb mit Stürmen anzuhalten.

Den 26. vnd 27. Augusti / Ward hefftig an der Brücken gebawet / vnd flogen ohn vntrilas 5. oder 6. Fenlein auff der Schantz / vnd war in dieser zeit fleißig gegen einander Wache gehalten.

Den 28. Augusti / kamen etliche von der Landschaft aus Cassuben / begerten sicher Beleidt / ein vnd aus der Stadt / als Unparteyische Unterhändler.

Den 29. vnd 30. Augusti / ward stets an der Brücken gebawet / als man aber vernemen mocht / das sie nun mehr schier fertig vnd schaden daraus folgen möchte / hat man den 31. Augusti einen Boyert mit Steinen geladen / vnd mit Kriegsvolck besetzt / Also mit vollem Siegel vnd durchstehendem Winde / auff die Brücken gelangffen / Welche von wegen der schwere / von stand an loss gebrochen / vnd mit dem Strom in die See werts eingetrieben ist.

Als

Als das Kriegsvolck in den Meuslöchern
ersehen / hetten sie sich gern ergeben / weil man
sie aber zu gnaden nicht auffnemē wolte / Daben
sie sich in den Strom begeben / in willens vber
die Weiffel nach ihrem Lager zuschwimmen.
Aber wie man gewis wissen kan / sein ihr wol
vber dreiffig nicht hinüber kommen / vnd sein
der Knechte in die Sechshundert gewesen / Al-
so hat **G D T T** der Almechtige das Block-
haus aus des Feindes gewalt erlediget.

Den ersten Septembris vmb Mittag zeit /
Ward die Landschaft aus Cassuben widerumb
zu der Stadt ausgeleitet.

Den Andern war es still.

Den 3. Septembris / auff den Abendt vmb
9. schleg / Dat der Feindt sein Lager mit dem
Blockhaus / so er gebawet hat / in den Brandt
gestecket / die Munde verlassen / vnd in das an-
der Lager vor der Stadt gerucket.

Den 4. vnd 5. ward es still.

Den 6. Septembris / früe Morgens / ist
der Feindt mit seinem gantzen Lager auffgebros-
chen / vnd in vollen Schlachtordnungen / bey
der Stadt vbergezogen. Diweil es aber sehr
Regnet / war nicht Bescharmützelt / Diesen tag
zwischen dreyen vnd vieren / Ward der Oberst
Dans von Cöllen / mit würdigen Ceremonien /
in der Pfarrkirchen zur Erden bestetiget.

E

Also

Also ist auff das mal / beibe die Stadt vnd
Blockhaus von des Feindes gewalt vnd Ty-
ranney durch Göttliche hülffe erhalten worden/
Allein was sich biss weilen etliche von den Po-
len / doch des mehrer theiles von des Ernst
Weyers Volck / umb die Stadt in den umb-
liegenden Dörffern vnd Wälden / zustreifen
vnd zu Rauben vntersehen.

Dagegen aber den Achten Augusti / vnser
Herrn von Dantzig / mit hülff des Königs
aus Dennemarck Galleyen vnd Schiffen / so
an vnterlas an der See / (dieselbe rein zubewa-
ren /) liegen allenthalben mit fünff vnd zwanz-
tzig grossen Galleyen vnd Beyerten an der See
werts in des Feindes Stedt / vnd an der See
liegende Flecken gerucket / Dieselben alle Brand
geschatzet / Die Stadt Elbing aber / welche
sich zur gegenwehr gestellet / vnd in die Tau-
sent Polen heimlicher weise eingelassen / fast
halb ausgebrandt / vnd das Tieff mit ihren
Schiffen versenckt / das man mit Schiffen we-
der zu / noch von führen kan / auch in die sieben-
tzig gros vnd kleine Schiff / Hollendische vnd
anderer ordten / so denselben des Feindes Sted-
ten zugefahren / gefangen genommen.

Mit den Polen haben vnser Kriegsvolck /
deren zwey Tausent an den Schiffen sampt den
Deutschen gewest / waren zween Scharmü-
tzel vor Elbing gehalten / Aber zu beiden thei-
len nicht viel Volcks geblieben.


Die

Diweil nun setzo das Römischen Reichs
Abgesandten bey dem König / vnd denen von
Dantzig einen Vortrag vnd Befridung zue-
handlen im Werck sein. Wolle der Allmech-
tige Gott solch vorhabendt Mittel zu
vorhüttung mehrers Blutuergiessens
mit Göttlichen gnaden / zum
besten verleihen vnd
geben / Amen.



Gedruckt zu Königsberg.
M. D. LXXIX.

Handwritten text, likely bleed-through from the reverse side of the page. The text is mirrored and difficult to decipher due to its orientation and fading.



M. D. L. X. X. I. X.
Gedruckt in Leipzig



154782

AB: 154782

ULB Halle


3


001 536 176



sb-796







1

Eigentliche Warhafft
tige vnd ganz gründliche Beschrei-
bung der Stadt Danzig / sampt dem zuge-
hörenden Blogkhaus / die Weiffelmunde ge-
nant / Belegung gantz ordentlichen zusamen
gesetzt / was sich alle tage zugetragen / vnd in
Scharmützein begeben hat / Durch einen
alten Kriegsman gestellet / vnd mit fleis
zusamen gezogen / geschrieben den
25. Nouemb. Im Sieben
vnd Siebenzigsten
Jare.



M. D. LXXIX.

957